

行也此五日之候也高象先曰奇哉三十幅
 共一較乾坤造化時陰陽交五六五者五日
 一候六者一月六候修丹之士火候最難平
 叔云不將火候者於文青霞子云六百篇中
 無限事豈教容易泄天機大凡火候在甲巳
 六日之中半夜子時遇甲日即右偃其爐取
 左門之氣遇巳日即左偃其爐取右門之氣
 自古神仙實祕不露此說不彰此法第名偃
 月爐平叔云偃月爐中玉蕊生凡溫養之法
 其要在防危慮險也呂公云進火工夫牛斗
 危平叔云抽添運用却防危陰符云火生於
 木禍發必尅也切忌之以此為戒譬如世間
 有國國中有主以文為左以武為右鄰國相
 侵須用御兵之將將得印而掌兵兵得器而
 用事兵印者乃軍中之命也既有將而統兵
 命既行可百戰百勝凡戰者先擊鼓奪旗以
 為上功既勝之後糧食盈滿河車搬運直入
 沈丸既入沈丸必須三閉三閉者上門神不
 出中門氣不亂下門精不漏是為三閉也三
 閉已住須用搬運乃曰肘後飛金精也許真

人云華池會飲顏如玉飛過金關臉似蓮金
 晶過三關得入元宮見金丹更不飛走自然
 伏也夫印者火也火乃鍊丹之本凡鍊金丹
 須以火候猶將有印而主兵其兵不亂凡用
 火候不可令水火有差差之則大事去矣五
 印者五事五事正則心不動心不動而物不
 走物既不走丹必成矣
 是書非金丹大道也未聞有術女而獲仙者
 故存此以警其惑實非修仙者之務焉
 紫園丹經




正一天師清微弟子 洪百
 道教學術資


上清金書玉字上經

方諸官青童君傳

風八



頭上真星兼思洞房神右足指帝星左足指
 尊星臨存時小屈左足以對於星也左手把
 北台右手執璇根密存祝訖而卧北斗中也
 行之九年除死上生名刻方諸府行之十八
 年九精來下雲車見迎璇根紐星之精名也
 北台元星之精名也卧息九斗之内心願飛
 仙上真廡庇華蓋之下白日乘雲登三晨
 右二十四字太上刻峨喙玉房東壁字文
 本古文不可解今出之





青童有言作洞房面有三陽兩已縱橫鼻為天山仰望明堂神關紫戶遂見洞房方圓壁立一寸正方靜存斗精來安其中照膽赤子無英三王乃成飛仙乘玄駕龍上造華辰驅使玉女玉童要道畢矣密奉密行

方諸官青蓋紫童始昔施行洞房偃息華辰卧起九精之內拘魂魄於北斗上是以號斗中真人也先師往受上清紫精君皇初紫虛君洞房上經青靈陽安君以傳中央黃老君三天太一元君即造太玄主仙府使定金書刻玉字名曰洞房上經
玉皇以付後聖李彭二君使與骨命應得仙者按而行之列名元圖刻生除死飛行神仙謁為後君之官以佐來聖李彭二君於是二君以金書洞房經一通付西玄宮洞臺內諸

得道真人以傳授當來成仙者於是二君以玉字洞房經一通付方諸官及玄洲仙都府使教宿命骨名當得道者後聖二君乘太虛之與浮遊十天九洞之門須期運告會乃治為帝理真官於神臺教種人於太平二君皆逆已察時萬兆宿命善惡飛攬虛玄知學仙道士可成與難若心誠志專固慕神真者終年倦倦情無傾動靈鑿形骨已有仙名玉錄者然後二君意同於是子乃得此書得書行者骨命已定玄閣錄已有生名仙籍故也後聖二君常藏影匿端初不自傳但使因緣致往今彼其於遭值得此神經耳或書出凡庸或出於俗濁之人此輩雖有此經而不行也所以為人受陰教而使役也故骨命有仙分得書者多由歷因致以獲於此或遇真仙之人先受書期盡應出傳之年已審視形骨乃有授子者子其懇念飛仙坐起祝之於心行之久久子自得此經子不可謂書出非所卑賤之間而蔑其文輕其授矣此皆是後聖之玄命陰已處分應得道之審故與於子也今

所宗奉所以承二君之意故敬及卑賤也亦如世間師主宗者皆致恭敬師主豈盡高賢哉蓋遠宗其根心耳靜齋七日乃受此經修行謹戒奉而按之不得雜處穢俗殄亂之人密而行使不覺外同俗內鏡灼如是始可與言洞房之事也此龜山真母要訣以勸西城王君二十八宿仰繫於華辰管運于四方之神按四極四具之科法太上洞房金書玉字之信皆當立製繒之誓為不妄泄之約也受得此經以青錦之帛三十二尺以奉有書者四方之數各八合三十二尺也有書得此帛又分以晚師如口訣若先受之於真仙述絕無蹤者則所分晚無由而致受之乃為施散供道用可須者又不得以外供雜碎上皇告盟重用金青札所謂盟青帛也九素經曰子受金書上已刻石慎無他散以求富祭斯其義也市此金帛每令上好者不可苟合以解責玄中亦當審子情狀矣此皆太上之書皆有定科初聽一百年得一傳七百年中得三傳過此不得復出傳非其人過限妄授皆為

世間世聞其祖父母以下受考三官身死天刑乃為下鬼王君云百年之內有二人可授者亦聽要以七百年內三傳為誓斗星者太極之蓋蓋玄真之靈林九皇之神席天尊之寔房也子行其道位為仙宗得飛八景之龍上造太微出入紫庭宴息北斗飛旋洞閣俯仰玄蓋呼吸華辰得乘流景以造三玄出入紫房遨遊太元名上金閣列為真人暮卧先存斗星在所卧席上令畫像按而存之如上法令我頭首九極使真氣入於泥丸足嘯尊帝二星常心念飛仙令高上拘我七魄太微制我三魂左手把北台右手執璇玑行之十八年必色反嬰顏一旦忽有九星之精變成上帝九老之公並俱來下迎以玄景飛龍要以真鈴乘八輿瓊輪紫羽華蓋導以仙官前嘯鳳鳴後作天鈞翠衣青帶白日登晨玉童玉女乃為執巾幕卧常密三七叩齒咽液三七陰祝曰九星太精北極真君益我精胎強我三魂左引日華右拘月津辰中黃景元虛黃真使我飛仙上登紫煙神虎玉符常守生

門萬邪依法受鍊斗君平旦欲起常密二七叩齒咽液二七陰祝曰天元上一斗中七童上清紫精在光身中華辰紫蓋太素玄宮後聖靈氣下入洞房使我飛仙得行太極金堂暮始卧存星之時皆先陰祝星名然後存星耳祝曰

第一太星精名玄樞願某飛仙乘虛駕浮

第二元星精名北台願某飛仙遊行洞臺

第三真星精名九極上真願某飛仙得治三

玄

第四紐星精名璇根願某玉名列為飛仙

第五綱星精名天平願某飛仙登行上清

第六紀星精名命機願某飛仙名書太微

第七闢星精名玄陽願某飛仙得使玉童

第八帝星精名高上玉皇願某飛仙得登後

聖之堂

第九尊星精名太微帝君願某飛仙得入丹

瑤玉房

右九條以次祝畢乃存星而安卧斗中也然後又密叩齒咽液祝九星太精北極真

君之說也

所存所祝都畢良久乃存斗星之精忽然入洞房之中光照一身洞徹五內三關百節皆令赤光赫然祝曰洞房元精赤子太尊斗光華蓋來照泥丸保鍊骨血拘魄制魂使某飛仙乘雲登晨上朝

玉帝太一元君都畢也所卧斗星之像但分精入於泥丸耳非又去此適彼之意也是為席上頭中兩處皆有耳青童君曰卧此斗陰精致仙使靈洞房致北斗陽精使五藏自生遂得乘景遊行上清如青童君之辭北斗有陰陽二精神也恐亦喻人之有魂魄二精矣此斗之星覆蓋華辰精輝九道光耀十天陽轉九九所以高尊世人唯見七星而不見其二其第八第九皆是帝皇太尊之精神玄隱內鏡保制天魂靈光暉灼為此七星作鎮但不照於世間流俗榮名之人耳諸成道高仙實真及上清太清之官乃得見之見之皆不得安道既見之後高上玉皇太微帝君乃當詣子授子真官俗人跳脫亦有誤見此二星

者見者慎勿言見也太上神錄曰諸見北斗高上太微一星皆增算三百年見二星增算六百年但俗人多穢未致於二尊來降耳此星乃大於七星光皆紫華有異於常煥煥甚可畏見者皆當拜叩頭請乞常以月三日二十七日夜竊候之勿令人知誠心久久無不見者星有三精故用二十七日也太上法諸妄說精名及見而泄者身被兵火卒而獲考地獄生死父母得罪三官秦時徐福本凡人也亦悟見二星乃不敢道遂得增年於是始信天下有仙乃知學道耳韓眾司馬季主及中嶽真人孟子卓張巨君逮尹執之徒皆亦得見之者也漢相國霍光家有典衣奴子名還車粗知書曾見光嚴具中有短卷書云常以月三日二十七日使竊候北斗數數為之當有所見見而拜拜而請乞畢勿傳皆增年三百歲於是還車密識常試視之非一忽見二星在斗上光明非常乃拜而還還車遂得增年六百此奴小有意而無大志遂不學道唯盈年於未死耳此語出王君君以傳大茅

君

上清金書玉字上經



太清金液神丹經卷上

正一天師張道陵序

興一

夫玄虛之號既不知其名而字之曰道道之為言猶覺悟也有一夕之寢者則有一旦之覺矣且論大夢然後有大寤覺夢之極其可略言乎戀生謂之弱喪欣死謂之樂無樂無所樂有不足有戀則甚惑樂無亦未達達觀兼忘同歸於玄既曰兼忘又忘其所忘心智泯於有無神精凝於重玄此窮理盡性者之所體也猶陶埴之士潛為不疾之塗寂然以應萬感之求散迹以乘幽明之徹故不可成之於一象微之於一名也皇王之號已不一矣道與堯孔其所疑哉直教有內外故理有深淺耳求之形骸則有鱗身四乳重瞳彩眉之異縉雲生而能言坐朝百靈享國征伐則乘雲氣而驅虎豹獸世界避則御飛龍而落六合顧視赤縣之內爭讓俯仰之事覆覆乎不猶嬰兒戲於一庭哉復有懸枕空同之上無慮之客順風而從之相與談乎營神之